

UCAPAN PERDANA MENTERI SEMASA MERASMIKAN  
MESYUARAT PERWAKILAN UMNO BAHAGIAN JOHOR  
BAHRU, DI TAPIAN GELANGGANG LARKIN, JOHOR  
BAHRU PADA 2HB MEI, 1980

Assalamu Alaikum Warahmatullahi Wabarakatuh.

Bismillahir Rahmanir Rahim.

Yang Berhormat Wakil Menteri Besar Johor<sup>1</sup>, Yang Berhormat Ahli-ahli Majlis Kerja Kerajaan Negeri dan Dewan Undangan Negeri, Yang Berhormat Timbalan Ketua dan Ahli-ahli Jawatankuasa UMNO Bahagian Johor Bahru, Yang Berbahagia Pemimpin-pemimpin MCA dan MIC, Para Perwakilan dan Pemerhati, Tuan-tuan dan Puan-puan sekalian.

Saya bersyukur kehadiran Allah Subhanahu Wata'ala kerana dapat sekali lagi merasmikan Mesyuarat Perwakilan UMNO Bahagian Johor Bahru. Saya mengucapkan berbanyak terima kasih serta setinggi-tinggi penghargaan kepada ahli-ahli Jawatankuasa dan seluruh ahli UMNO di Bahagian ini kerana sudi memilih saya sekali lagi memimpin Bahagian ini. Saya minta maaf kerana disebabkan tugas dan tanggungjawab saya yang lain saya jarang-jarang dapat menghadiri mesyuarat Jawatankuasa Bahagian.

Saya menyanjung tinggi serta sentiasa menghargai keyakinan dan kepercayaan yang telah diberikan kepada saya itu. Sokongan dan kerjasama pemimpin-pemimpin dan ahli-ahli sekalian telah banyak meringankan tugas dan kewajipan saya sebagai Ketua Bahagian.

Tuan-tuan dan Puan-puan sekalian,

Pada 31 haribulan Ogos ini, genaplah dua puluh tiga tahun usia negara kita mencapai Kemerdekaan. Berasaskan Perlembagaan Persekutuan kita telah berjaya selama ini mengamalkan sistem pemerintahan demokrasi berparlimen. Di bawah sistem ini rakyat memegang kuasa mutlak memilih Kerajaan. Penentuan bentuk corak Kerajaan adalah melalui pengundian dalam pilihanraya.

---

<sup>1</sup> YB Dato' Haji Ngah Abdul Rahman.

Dengan hak pengundian ini, rakyat berkuasa menentukan sesebuah parti politik menubuhkan Kerajaan. Sesebuah Kerajaan boleh diturunkan atau dikekalkan melalui pilihanraya. Sistem pemerintahan demokrasi berparlimen ini didapati amat sesuai bagi menjamin kestabilan politik negara.

Semenjak tahun 1955, melalui pilihanraya umum yang pertama, UMNO telah melibatkan diri dalam pentadbiran negara. Dalam setiap pilihanraya yang berikutnya UMNO sentiasa menerima sokongan dan kepercayaan rakyat. Berkat sokongan dan kepercayaan ini, UMNO telah dapat mencorakkan suasana keadaan politik negara dan meletakkan kepentingan rakyat dan negara dalam keadaan yang terpelihara. Sebagai sebuah parti politik yang terbesar dan tertua, UMNO sentiasa menyanjung tinggi serta menghargai sokongan dan kepercayaan rakyat. Kita sentiasa sedar bahawa kedudukan parti kita adalah bergantung kepada sokongan sebilangan besar rakyat jelata.

Memanglah menjadi hasrat UMNO memelihara dan mengekalkan sokongan dan kepercayaan rakyat jelata buat selama-lamanya, Insya Allah. Kejayaan ini hanya dapat dihasilkan jika sebahagian besar rakyat yang menyokong parti kita dapat menyertai dan mengundi dalam pilihanraya. Oleh itu adalah amat perlu dan penting UMNO mengambil berat serta menentukan supaya sebilangan besar rakyat yang berhak mengundi, terutamanya orang-orang Melayu, mendaftarkan diri sebagai pengundi. Jika ini tidak dilakukan maka kedudukan parti kita akan tergugat dan keadaan ini akan melibatkan penyertaan UMNO dalam pentadbiran dan politik negara. Saya menggesa pemimpin UMNO di semua peringkat supaya mengambil daya usaha bagi memastikan setiap rakyat yang berhak dan layak mengundi didaftarkan.

Tuan-tuan dan Puan-puan sekalian,

Sebagai sebuah parti yang telah mempelupuri penyertaan orang-orang Melayu dalam politik negara, UMNO mestilah sentiasa mendampingi rakyat, khususnya masyarakat Melayu serta menerangkan kepada mereka mengenai tujuan suci perjuangan parti kita. Pemimpin dan ahli-ahli UMNO hendaklah sentiasa menerangkan dengan jelas kepada rakyat segala dasar-dasar Kerajaan serta langkah dan tindakan yang dilaksanakan oleh Kerajaan.

Dengan seberapa yang boleh kita mestilah cuba mempengaruhi dan menarik minat seluruh anggota masyarakat Melayu menyokong UMNO dan menyertai perjuangan parti kita.

Saya berpendapat adalah penting supaya UMNO terus mempelupuri perpaduan orang-orang Melayu dan kaum Bumiputera yang lain sebagaimana yang telah kita jaya dan buktikan dalam tahun-tahun empat puluhan dan lima puluhan. Perpecahan politik di kalangan masyarakat Melayu akan hanya merugikan bangsa dan agama kita. Itulah sebabnya saya telah menyeru ahli-ahli PAS supaya menyokong perjuangan UMNO dan seelok-eloknya menjadi ahli UMNO. Oleh kerana kita semua mengikuti ajaran Islam yang sama, saya tidak faham kenapakah kita masih dan mesti lagi berpecah-belah. Bukankah baik kita semua sama-sama memperjuangkan nasib rakyat di bawah naungan UMNO? Saya sentiasa mendoakan semoga Allah membuka pintu hati dan memberikan petunjuk-Nya kepada ahli-ahli PAS.

Sejak ditubuhkan tiga puluh empat tahun yang lalu, UMNO telah berjaya memperjuangkan perpaduan masyarakat Melayu demi kepentingan bangsa, agama dan negara. UMNO telah berjaya meletakkan taraf kedudukan agama Islam di peringkat yang paling tinggi melalui undang-undang Perlembagaan Persekutuan. Undang-undang syariah dilaksana dan dikuatkuasakan kepada umat Islam di negeri-negeri. Pada hemat saya perpaduan orang-orang Melayu adalah penting bukan sahaja bagi meninggikan lagi syiar Islam, bahkan dan yang lebih penting lagi ialah bagi menjayakan Dasar Ekonomi Baru.

Tuan-tuan dan Puan-puan sekalian,

Kejayaan Dasar Ekonomi Baru bergantung kepada keupayaan Kerajaan Barisan Nasional memastikan supaya ekonomi negara dapat bertumbuh dengan pesat. Di dalam tempoh pelaksanaan Dasar itu, perkembangan ekonomi negara akan dicapai melalui galakkan Kerajaan kepada pertumbuhan pelaburan di dalam kedua-dua sektor awam dan swasta. Pelaburan dapat mewujudkan peluang-peluang pekerjaan. Ini akan menguntungkan beribu-ribu rakyat yang masih menganggur dan separuh menganggur yang mengharapkan pembelaan Kerajaan.

Kerajaan Barisan Nasional memberi perhatian berat kepada golongan yang berpendapatan rendah, tidak kira sama ada penganggur, buruh, pekerja-pekerja kilang, petani, nelayan atau pun



YAB Dato Hussein Onn, ketika menerima cek sumbangan UMNO Johor Bahru untuk Bangunan Ibu Pejabat UMNO di Mesyuarat Perwakilan UMNO Bahagian Johor Bahru di Tapian Gelanggong, Larkin pada 2hb Mei, 1980.

pekebun-pekebun kecil. Kepentingan rakyat yang kurang bernasib baik ini sentiasa diutamakan oleh Kerajaan. Sesungguhnya, UMNO yang mendukung Kerajaan Barisan Nasional telah kian lama bergerak memperjuangkan kepentingan rakyat jelata khususnya golongan yang berpendapatan rendah dan penduduk-penduduk yang kurang bernasib baik. Sokongan rakyat golongan inilah yang telah meletakkan UMNO di kemuncak kedudukan politik negara. Selagi Kerajaan Barisan Nasional didukung oleh UMNO dan selagi UMNO memegang pentadbiran negara, maka selama itulah golongan-golongan ini akan terus menerima pembelaan.

Dalam hubungan ini, Parti-parti komponen dalam Barisan Nasional termasuk UMNO, dan Kerajaan tidak dapat menerima pandangan pihak yang hanya membela golongan-golongan yang tertentu sahaja tanpa mengambil kira kepentingan negara pada keseluruhannya. Berikutan dengan kelulusan pindaan kepada undang-undang buruh oleh Parlimen, sebilangan pemimpin MTUC telah mengecam pemimpin-pemimpin Kerajaan. Mereka ini menganggap dan mengisytiharkan parti-parti komponen dalam Barisan Nasional sebagai musuh kepada kesatuan sekerja. Sikap sebilangan pemimpin MTUC ini amatlah mendukacitakan lebih-lebih lagi terhadap usaha mereka yang cuba hendak memisah dan menjauhkan kaum pekerja dengan Kerajaan dan parti-parti politik yang menganggotai Kerajaan. Mereka cuba menidakkan sumbangan dan usaha Kerajaan terhadap golongan yang berpendapatan rendah, khususnya pekerja-pekerja. Walau bagaimanapun, saya penuh yakin kaum pekerja tidak semudah itu boleh diperdayakan oleh sebilangan pemimpin kesatuan sekerja yang tidak bertanggungjawab.

Tuan-tuan dan Puan-puan sekalian,

Saya berpendapat adalah perlu bagi semua pihak yang terlibat dalam pertikaian ini membeza dan mengasingkan kepentingan golongan kaum pekerja dengan kepentingan kesatuan-kesatuan sekerja. Dengan memahami perbezaan ini maka jelaslah ternampak kepada kita bahawa Kerajaan adalah sebenarnya bersungguh-sungguh mengutamakan kepentingan pekerja-pekerja dan mengambil perhatian berat di atas masalah yang dihadapi oleh golongan ini. Hanya sebilangan pemimpin kesatuan sekerja ini sahaja yang sengaja tidak mahu memahami hakikat yang sebenarnya dan cuba membuat dakyah untuk memburuk-burukkan Kerajaan.

Sebagaimana yang telah diumumkan oleh Menteri Buruh dan Tenaga Rakyat<sup>2</sup> bahawa Kerajaan akan meminda Ordinan Pekerjaan pada Persidangan Parlimen yang akan datang. Pindaan undang-undang ini akan banyak membawa faedah kepada kaum pekerja. Ini adalah bukti nyata berkenaan dengan hasrat Kerajaan hendak membela dan memperjuangkan nasib masa depan dan kebajikan kaum pekerja.

UMNO memang sudah lama memperjuangkan kepentingan rakyat yang miskin dan golongan yang berpendapatan rendah termasuklah kaum pekerja. UMNO sentiasa sedar bahawa kekuatannya adalah bergantung kepada sokongan golongan ini. Kami tidak akan mengabaikan tanggungjawab kami terhadap mereka ini. Saya menggesa pemimpin-pemimpin UMNO, khususnya Bahagian-bahagian yang mempunyai kawasan-kawasan bandar seperti Bahagian Johor Bahru ini, supaya sentiasa mengambil perhatian berat di atas masalah-masalah yang dihadapi oleh kaum pekerja. Pemimpin dan ahli-ahli UMNO hendaklah sentiasa mendekati dan mendampingi mereka ini serta memberi penerangan yang sejelas-jelasnya di atas apa jua dasar dan tindakan Kerajaan yang melibatkan kedudukan mereka.

Akhirnya, saya sekali lagi mengucapkan berbanyak terima kasih serta setinggi-tinggi penghargaan kepada semua pihak yang telah sama-sama menjayakan majlis pembukaan ini dan seterusnya Mesyuarat Perwakilan ini.

Tuan-tuan dan Puan-puan sekalian,

Dengan ini, saya dengan amat sukacitanya mengisytiharkan Mesyuarat Perwakilan UMNO Bahagian Johor Bahru ini dibuka dengan rasminya.

Wabillahit-taufik Wal-hidayah, Wassalamu 'alaikum Warahmatullahi Wabarakatuh.

---

<sup>2</sup> YB Datuk Richard Ho Ung Hun.